



NVE

Adresseinformasjon fylles inn ved ekspedering. Se mottakerliste nedenfor.

Vår dato: 05.06.2026

**Sakshandsamar:** Herman Lange

Vår ref.: 202308754-120/202314192-123/202519873-35/ Johnsen, [herj@nve.no](mailto:herj@nve.no), 22 95 98 27  
202519874-38 Oppgje ved kontakt

Dykkar ref.:

## NVE gjev konsesjonsløyve og samtykke til oreigning for transformatorstasjonar i Vik

Noregs vassdrags- og energidirektorat (NVE) har i dag fatta vedtak om å gje Statnett SF og Sygnir AS konsesjon til å byggje, eige og drive to transformatorstasjonar ved Refsdal kraftverk i Ovrisdalen. Statnett får òg konsesjon til oppgradering av delar av fylkesveg 5601 og ein privat veg, etablering av fem permanente masselager og å leggje om dagens kraftleidning rundt det nye stasjonsområdet. Sygnir får vidare konsesjon til å overta og byggje om Hove transformatorstasjon. NVE har òg gjeve Statnett og Sygnir oreigningsløyve for å byggje, eige og drive anlegga. Statkraft Energi AS får løyve til å byggje nye kraftleidningar frå Hove, Refsdal og Målset kraftverk inn til dei nye stasjonane. Tiltaka ligg i Vik kommune i Vestland fylke.

NVE behandlar ikkje kraftleidningane Statnett og Sygnir søker om no. Dette vil gjerast på et seinare tidspunkt.

Konsesjonsdokumenta, oreigningsløyva og notatet «Grunngjeving for vedtak» med vurderingane i saka er tilgjengelege på NVE sine internettsider:

- Statnett: [www.nve.no/16091/A](http://www.nve.no/16091/A)
- Sygnir: [www.nve.no/16121/A](http://www.nve.no/16121/A)
- Statkraft (Hove kraftverk): [www.nve.no/25810/A](http://www.nve.no/25810/A)
- Statkraft (Refsdal og Målset kraftverk): [www.nve.no/25797/A](http://www.nve.no/25797/A)

Denne orienteringa vert sendt til alle høyrings- og orienteringsinstansar. Den allmenne høyringa, offentlege møte og møte med lokale og regionale styresmakter er ein sentral del av NVE si konsesjonshandsaming. Gjennom denne prosessen, der ein kvar har høve til å kome med innspel og synspunkt, skal NVE sikre at alle sider ved saka er gjort reie for. Vi har no gjeve konsesjon og takkar for alle innspel og kommentarar som har kome i den allmenne høyringa.

E-post: [nve@nve.no](mailto:nve@nve.no), Postboks 5091, Majorstuen, 0301 OSLO, Telefon: 22 95 95 95, Internett:

[www.nve.no](http://www.nve.no)

Org.nr.: NO 970 205 039 MVA Bankkonto: 7694 05 08971



**NVE**

Norges vassdrags-  
og energidirektorat

## Partsinnsyn

Forvaltningslova sine regler om partsinnsyn gjev grunneigar/rettshavar rett til å be om å få sjå dokumenta i saka. Ønskjer du å sjå dokumenta, gå til [www.einnsyn.no](http://www.einnsyn.no), eller ta kontakt med sakshandsamar i NVE.

## Klagerett

Du kan klage på avgjerdene, sjå orientering om rett til å klage på siste side. Eventuelle klagar vert sendt til søkar før saka vert lagt fram for Energidepartementet.

Ei klage må innehalde opplysningar som gjer det mogeleg for NVE å avgjere om klagaren har klagerett. Partar (grunneigarar, rettshavarar og konsesjonssøkar) og andre med rettsleg klageinteresse (andre med spesielt nær rettsleg, økonomisk eller faktisk tilknytning til saka og organisasjonar som representerer interesser som vedtaket får verknader for) har rett til å klage på vedtaket. Å gje uttale eller på annan måte verte orientert om saka gjev ikkje i seg sjølv rett til å klage på avgjerda.

## NVE har ikkje ferdigbehandla kraftleidningane

Statnett og Sygnir har òg søkt om konsesjon for fleire kraftleidningar i Vik kommune. NVE fekk ei rekke innspel i høyringa, og fleire omhandla val av trasear for kraftleidningane som gav behov for nye utgreiingar. NVE vurderte det som mest formålstenleg å behandle tiltaka vi no gir løyve til først, i påvente av utgreiingane. NVE tek derfor ikkje no stilling til val av trasear for kraftleidningane Statnett og Sygnir søkjer om. NVE sin sakshandsaming av kraftleidningane vil fortsetje når vi har motteke endelege utgreiingar.

Med helsing

Ingrid Myrtveit

seksjonssjef

Herman Lange Johnsen

seniorrådgjevar

*Dokumentet vert sendt utan underskrift. Det er godkjent etter interne rutinar.*

### Mottakarliste:

Grunneigarar/rettshavarar

Naboer/gjenboere



**NVE**

Norges vassdrags-  
og energidirektorat

## Orientering om rett til å klage

|   |  |
|---|--|
| Frist for å klage                                       | <p>Fristen for å klage på vedtaket er 3 veker frå den dagen vedtaket kom fram til deg. Dersom vedtaket ikkje har kome fram til deg, startar fristen å gå frå den dagen du fekk eller burde ha fått kjennskap til vedtaket.</p> <p>Det er tilstrekkeleg at du postlegg klagen før fristen går ut. Klagen kan ikkje handsamast dersom det har gått meir enn 1 år sidan NVE fatta vedtaket.</p>   |
| Du kan få grunngjeving for vedtaket                     | <p>Dersom du har fått eit vedtak utan grunngjeving, kan du be NVE om å få ei grunngjeving. Du må be om grunngjevinga før klagefristen går ut.</p>  |
| Kva skal med i klagen?                                  | <p>Klagen bør vere skriftleg. I klagen må du:</p> <ul style="list-style-type: none"><li>• Skrive kva for vedtak du klagar på.</li><li>• Skrive kva for eit resultat du ønsker.</li><li>• Opplyse om du klagar innanfor fristen.</li><li>• Underteikne klagen. Dersom du brukar ein fullmektig, kan fullmektigen underteikne klagen.</li></ul> <p>I tillegg bør du grunngje klagen. Dette betyr at du bør forklare kvifor du meiner vedtaket er feil.</p> |
| Du kan få sjå dokumenta i saka                          | <p>Du har rett til å sjå dokumenta i saka, med mindre dokumenta er unnateke offentlegheit. Du kan ta kontakt med NVE for å få innsyn i saka.</p>   |
| Vilkår for å gå til domstolane                          | <p>Dersom du meiner vedtaket er ugyldig, kan du gå til søksmål. Du kan berre gå til søksmål dersom du har klaga på vedtaket til NVE, og klagen er avgjort av Energidepartementet (ED) som overordna forvaltingsmyndigheit.</p> <p>Du kan likevel gå til søksmål dersom det har gått 6 månader sidan du sende klagen, og det ikkje skuldast forsøming frå di side at klagen ikkje er avgjort.</p>   |
| Sakskostnader   | <p>Dersom NVE eller ED endrar vedtaket til din fordel, kan du søke om å få dekkar vesentlege og nødvendige kostnader. Du må søke om dette innan 3 veker etter at klagevedtaket kom fram til deg.</p>   |
| Kven kan klage på vedtaket?                             | <p>Dersom du er part i saka, kan du klage på vedtaket. Du kan også klage på vedtaket dersom du har rettsleg klageinteresse i saka.</p>   |
| Kvar skal du sende klagen?                              | <p>Du må adressere klagen til ED, men sende han til NVE. E-postadressa til NVE er: <a href="mailto:nve@nve.no">nve@nve.no</a>.</p> <p>NVE vurderer om vedtaket skal endrast. Dersom NVE ikkje endrar vedtaket vil vi sende klagen til ED.</p>  |
| Du kan be om avgjerd om utsett iverksetjing av vedtaket | <p>Du kan be om avgjerd om at vedtaket ikkje skal setjast i verk før klagefristen er ute eller klaga er avgjort.</p> <p>Klage på vedtak om samtykke til ekspropriasjon har utsetjande verknad, med mindre det er gjort vedtak om noko anna.</p>  |

*Denne forklaringa bygger på forvaltningslova sine reglar i §§ 11, 18, 19, 24, 27 b, 28, 29, 31, 32, 36 og 42.*